



17% sampah dibuang dalam sungai

AMPANG: Kajian mendapati purata setiap individu di negara ini membuang antara 1.1 sehingga dua kilogram sampah setiap hari ke dalam sungai, kata koordinator program penjagaan sungai dari Pusat Alam Sekitar Global (GEC), Dr K Kalithasan.

Sambil menyatakan kebimbangan terhadap fenomena itu Kalithasan (***gambar***) berkata, kajian juga mendapati kadar pembuangan sampah di negara ini masih di tahap tinggi dan ia jelas menjejaskan ekosistem alam.

“Kesedaran orang ramai mengenai kepentingan pemuliharaan sungai perlu dititikberatkan. Kajian turut mendapati 17 peratus daripada sampah dibuang adalah ke sungai,” katanya.

Beliau berkata demikian ketika memberikan taklimat pada Seminar Jawatankuasa Penduduk (JKP) siri 2/2012 anjuran Majlis Perbandaran Ampang Jaya (MPAJ) di Galeri MPAJ, di sini, semalam.

Taklimat itu dihadiri 324 peserta membabitkan 67 pertubuhan dan 24 wakil penduduk.

Menurut Kalithasan, bagi sungai di bandar, pembuangan sampah setiap individu dianggarkan seberat 1.8 kilogram.

Hadir merasmikan program 'River of Life' itu Pengarah Jabatan Belia dan Masyarakat MPAJ, Khairilazhar Ismail.

Menurut Khairilazhar, program anjuran tahunan itu bertujuan menyedarkan peserta mengenai kualiti sungai, pembersihan sampah dan pengurusan sisa pepejal.

“Fokus utama adalah mengenai masa depan Sungai Klang, Sungai Gombak dan Sungai Seputih yang tidak terlepas dibuang sampah. Sehubungan itu, ia tanggungjawab bersama menguruskan dan memelihara sungai terbabit,” katanya.